

françois; la mere de Catherine mourut et
laissa ses deux petits enfans avec ce seul
regret de les abandonner sans baptesme.
On dit d'elle quelle estoit une seruante
chrestienne et qu'elle pria iusques a la
mort et que peut estre sa priere a obtenu
la grace du baptesme a sa fille et a nous
la grace de posseder une S^{te}. lenfant
mourut et il ne resta plus que Catherine
qui pensa mourir a laage de quatre ans
parcequelle fut attaquée de la petite
uerole, laquelle a succession de temps luy
a procuré le bien de la uirginité, son
uisage qui estoit bien fait auparauant en
fut tout gasté il sen fallût peu quelle
ne perdit la ueüe et ses yeux furent gastés
de ce mal en telle sorte quelle ne
pouuoit souffrir une grande lumiere, ce
qui lobligeoit a se tenir toujours enue-
loppée en sa couuerte et ce qui a fauorisé
le desir quelle auoit de uiure inconnue;
elle remercia souuent nostre Seigneur de
cette grace, appellant une grace cette in-
commodité, dautant que si elle eust eu
bonne mine les ieunes gens lauroint
plus recherchée et quelle auroit fait
comme les autres filles qui s'abandonnent
au peché dans le pais des iroquois.